



Broj: 01/3-50-3-3-13/17
Sarajevo, 30.6.2017.

ZABILJEŠKA

sa sastanka Komisije za vanjsku trgovinu i carine Predstavničkog doma Parlamentarne skupštine Bosne i Hercegovine s članovima Odbora za privredu, regionalni razvoj, trgovinu, turizam i energetiku Narodne skupštine Republike Srbije

Sastanak je održan 30.6.2017., u zgradi Parlamentarne skupštine BiH, s početkom u 10,30 sati, u sali 2/II.

Iz Komisije za vanjsku trgovinu i carine Predstavničkog doma sastanku su prisustvovali: Šemsudin Mehmedović, predsjedavajući Komisije, Mensura Beganović i Zaim Backović, članovi Komisije, i Mirjana Crnjak, sekretarka Komisije. Iz Odjela za protokol Sektora za međunarodne odnose i protokol prisutna je bila Milena Likokur.

U delegaciji Odbora za privredu, regionalni razvoj, trgovinu, turizam i energetiku Narodne skupštine Republike Srbije bili su: Snežana Paunović, članica Odbora i šefica delegacije, Gorica Gajić i Nataša Mihajlović-Vacić, članice Odbora, i Aleksandra Balać, sekretarka Odbora.

Predsjedavajući Komisije Šemsudin Mehmedović izrazio je dobrodošlicu i zahvalio se gošćama što su se odazvale našem pozivu. Potom je predstavio prisutne članove Komisije i sekretarku Komisije. Uz dobrodošlicu, predsjedavajući Komisije čestitao je inauguraciju novog predsjednika Republike Srbije i nove premijerke Vlade Republike Srbije, izražavajući nadu da će Srbija s osiguranom političkom stabilnošću biti faktor stabilnosti na Balkanu i da će zajedno s Bosnom i Hercegovinom biti na istom putu ka euroatlantskim integracijama. Istaknuo je da je tema sastanka vanjskotrgovinska razmjena između Bosne i Hercegovine i Republike Srbije i eventualni problemi i prepreke koji su na tom putu, radi sagledavanja svega što mogu zajednički učiniti kako bi olakšali privrednicima da vanjskotrgovinska razmjena između dvije zemlje bude na mnogo višem nivou.

Kazao je da Bosna i Hercegovina kao država ima svoj poseban cilj, a to je da stepen pokrivenosti uvoza izvozom, s Republikom Srbijom, bude veći od 35%, koliko sada iznosi, i da dosegne bar 70-80%. Predsjedavajući Mehmedović dodao je da smo svjesni stvarnog političkog stanja, odnosa u regiji i između naše dvije zemlje, kao i postojećih nekonvencionalnih metoda i prepreka, te da želi o svim pitanjima razgovarati otvoreno.

Zatim je istaknuo da su Bosna i Hercegovina i Srbija jedna drugoj najvažniji vanjskotrgovinski partneri, te da trebaju preduzeti konkretne korake kako bi pokrivenost uvoza izvozom iz Bosne i Hercegovine u Srbiju bila na još višem nivou.

Kada je riječ o egzaktnim podacima, istaknuo je da je u zadnjoj godini Bosna i Hercegovina uvezla robu iz Srbije u vrijednosti 2,3 milijarde KM, a izvezla 800 miliona KM, što je svega 35% pokrivenosti izvoza uvozom. Zbog toga je bh. delegacija izrazila nezadovoljstvo zbog postojećih barijera, koje nisu carinske nego su pitanje neprofesionalnog odnosa onih koji rade na tim poslovima. Kazao je da dvije zemlje trebaju težiti osiguravanju potpune slobode za kretanje robe i kapitala, jer su obje potpisnice CEFTA-e. Istaknuo je kako Bosna i Hercegovina očekuje da predsjednik Srbije Aleksandar Vučić, kao jedan od tvoraca Briselskog sporazuma, u njega ugradi i slobodno kretanje građana BiH na Kosovo, a ne strogim viznim režimom sprečavati bh. privrednike da razvijaju privrednu saradnju s ovim dijelom Balkana.

Snežana Paunović, članica Odbora za privredu, regionalni razvoj, trgovinu, turizam i energetiku Narodne skupštine Republike Srbije i šefica delegacije, zahvalila se na pozivu u svoje i u ime prisutnih članica Odbora Gorice Gajić i Nataše Mihajlović-Vacić, te izrazila zadovoljstvo posjetom. Također se zahvalila na čestitkama za novoizabranog predsjednika i novu Vladu Srbije.

Istaknula je kako ima mnogo prostora za unapređenje ekonomske i političke saradnje dvije zemlje. Prema njenim riječima, potrebno je posvetiti posebnu pažnju smanjenju vanjskotrgovinskog deficita između dvije zemlje, jer sve teme između njih nisu ni prijatne ni lagane, ali je došlo vrijeme da se prevladaju razlike i stvara zajednička nova budućnost. Rekla je kako u osnovi imaju i potrebu i dobar osnov za razgovor o svim pitanjima i međusobnim problemima, ali i da kao ravnopravni partneri nastupaju na vanjskom tržištu. Istaknula je da kapacitet Srbije i Bosne i Hercegovine nije mali i ako se udruže, bit će privlačne za zemlje EU i šire. Srbija sad ima punu političku stabilnost i učinit će sve da ostane faktor stabilnosti kada je u pitanju region Balkana, istaknula je Snežana Paunović. Prema njenim riječima, nema nikakvog razloga za to da saradnja Bosne i Hercegovine i Srbije ne bude unaprijeđena, te da odnosi Sarajeva i Beograda idu u tom smjeru.

Članica Komisije Mensura Beganović pozdravila je prisutne gošće i pitala kako je Srbija uspjela doći na 47. mjesto na svjetskoj ljestvici kada je u pitanju poslovanje, a Bosna i Hercegovina na 81., zamolivši za informacije ili sugestije kako to postići?

Također je kazala da je slična situacija kada je u pitanju pokretanje posla jer je Srbija i na toj svjetskoj ljestvici na 47. mjestu, a Bosna i Hercegovina na 174. Kazala je da su to dva toliko različita parametra, pri čemu Bosna i Hercegovina i Srbija imaju mnogo sličnosti, pa nas zanima kako je Srbija uspostavila relativno dobar ambijent za domaće i strane investitore. Izrazila je zadovoljstvo time što su Bosna i Hercegovina i Srbija riješile pitanja priznavanja tehničkih certifikata za usklađenost proizvoda, ali da postoji još jedan sporazum koji je, kako je kazala, „na čekanju“, a to je Protokol o međusobnom priznanju certifikata za industrijsku robu između Bosne i Hercegovine i Srbije. Gospođa Beganović naglasila je da Bosna i Hercegovina ima veliki interes za rješavanje ovog pitanja, što bi bh. privrednicima bilo vrlo korisno. Istaknula je kako ima još mnogo tema o kojima se može razgovarati.

Zaim Backović također je pozdravio prisutne gošće i kazao kako treba riješiti niz otvorenih pitanja između dvije zemlje, posebno kada je riječ o saradnji u oblasti drvne i građevinske industrije, kao i o pitanju priznavanja diploma.

Gorica Gajić i Nataša Mihajlović-Vacić, članice Odbora, istaknule su da sva otvorena pitanja koja se tiču privredne saradnje dvije zemlje treba proslijediti nadležnim ministarstvima, ali i pratiti stepen njihove realizacije.

Delegacija Narodne skupštine Republike Srbije predstavila je inicijativu predsjednika Srbije o stvaranju zajedničke carinske unije zemalja Zapadnog Balkana koja bi omogućila izgradnju snažne privrede u zemljama regiona i pozicionirala ih u nastupu prema trećim zemljama.

Na sastanku je zaključeno da je ovo početak razgovora te da treba delegirati konkretna pitanja i probleme onima koji su nadležni za njihovo rješavanje.

Na kraju razgovora Snežana Paunović zahvalila se za gostoprimstvo i uputila poziv Komisiji za uzvratnu posjetu i nastavak razgovora.

Šemsudin Mehmedović također se, u ime Komisije, zahvalio na pozivu za posjetu Beogradu, te zaželio gošćama ugodan i uspješan boravak u Bosni i Hercegovini.

Sastanak je završen u 12 sati.

SEKRETARKA KOMISIJE
Mirjana Crnjak

PREDSJEDAVAJUĆI KOMISIJE
Šemsudin Mehmedović